



## Lažni pasoši 10.000 eura

Od deset uhapšenih osoba, tri su predate na dalje postupanje sarajevskom Kantonalnom tužilaštvu. Među njima nema službenika iz IDDEEA



Privođenje u Kantonalni sud  
/ BENJAMIN BEŠIĆ

Tri od ukupno deset osoba uhapšenih u ponedjeljak u akciji kodnog naziva Papyrus, koju je **SIPA** izvela na području Zvornika i Sarajeva, nakon krim-obrade predate su na dalje postupanje sarajevskom Kantonalnom tužilaštvu, potvrdila je za Oslobođenje Azra Bavčić, portparolka ove pravosudne institucije.

Oni će biti saslušani, nakon čega će postupajući tužilac odlučiti da li će za njih zatražiti određivanje pritvora.

Kako saznajemo iz izvora bliskih istrazi, Tužilaštvo će najvjerojatnije zatražiti određivanje pritvora za dvije osobe, koje su u inostranstvu, tako da će nakon tog zahtjeva uslijediti raspisivanje potjernica.

Ova grupa, podsjetimo, tereći se za organizovani kriminal,

krivotvorenje isprave i ovjeravanje neistinitog sadržaja, odnosno da je, kako je javila Srna, pribavila lažne dokumente BiH za 36 osoba iz kriminalnog miljea.

Prema neslužbenim informacijama koje je objavila Srna, lažni pasoši su koštali oko 10.000 eura, a ukradeni identitet imali su kriminalci sa područja Srbije, Crne Gore, Bugarske i jedna osoba koja je 17. jula uhapšena u Peruu zbog krijumčarenja droge iz Južne Amerike u Evropu. U Zvorniku su, prema izvoru Srne, uhapšeni B. Đ. i S. M.

Iz Agencije za identifikacione dokumente, evidenciju i razmjenu podataka BiH (IDDEEA) jučer su istakli da nije uhapšen nijedan njihov službenik, niti su organizacione jedinice ove agencije bile predmet policijskih pretresa.